

22 MAY 2001

MAHATHIR AKAN HADIRI SIDANG KEMUNCAK G15 DI JAKARTA

KUALA LUMPUR, 22 Mei (Bernama) -- Perdana Menteri Datuk Seri Dr Mahathir Mohamad akan menghadiri mesyuarat sidang kemuncak Kumpulan 15 Negara-negara Membangun (G15) yang dijadualkan selama dua hari di Jakarta dari 30 Mei.

Wisma Putra akan mengeluarkan kenyataan mengenai sidang kemuncak itu kemudian, kata Menteri Luar Datuk Seri Syed Hamid Albar pada sidang media di Kementerian itu di sini hari ini.

Sambil menjelaskan bahawa G15 lebih merupakan mekanisme kerjasama ekonomi daripada politik, Syed Hamid membayangkan bahawa sidang kemuncak Jakarta akan berurusan dengan "banyak perkara ekonomi untuk melihat bagaimana negara-negara Selatan-Selatan bekerjasama dalam bidang ekonomi, kewangan dan perdagangan".

Sidang kemuncak G15 tahun lepas di Kaherah telah mengenal pasti beberapa bidang yang negara-negara anggota masih boleh tingkatkan lagi kerjasama, katanya.

"Proses kerjasama dan meningkatkan perdagangan adalah urusan berterusan, terdapat lebih banyak perdagangan sekarang daripada sebelum ini, tetapi masih terdapat banyak potensi untuk dibangunkan lagi," katanya.

Menteri-menteri Luar G15 akan bermesyuarat dari 27 Mei, sebelum sidang kemuncak itu, kata Syed Hamid.

-- BERNAMA
AFY AHH RHM